

Tram nobo ta forma parti di e plan original

ORANJESTAD – Awe ta yega abordo di e barco **Viking Eagle** for di Miami, e di tres streetcar cu lo core riba e ruta for di waf di Oranjestad pa Caya G.F. Betico Croes. E streetcar color oraño ta forma parti di e plan manera a keda presenta originalmente, locual ta nifica cu no ta un compra adicional.

For di un principio, e plan Renobacion Oranjestad a papi di un sistema di tram pa

transporta turistanan for di area di waf di crucero, y ta atravesá henter caya principal te na su ultimo tiendan na Plaza Nikki Habibe y bin bek.

E streetcar tambe ta destina pa trahadonan di tienda y otro establecimentonan den centro di ciudad. Di e manera aki nan por laga nan auto staciona na e parkeerplaats publico y yega pia di trabou lagando espacio pa consumidornan por yega mas cerca di

e tienda cu nan kier bishita.

Prome dos streetcar cu a yega Aruba ta cumpra na 2013 y 2014 a sali for di presupuesto di proyecto Renobacion Oranjestad cu a wordo aproba na aña 2010, mientras cu esun cu ta yega awe y e ultimo cu ta yega na luna di october proximo, ta paga cu Fondo Desaroyo Aruba.

Ta bon pa menciona cu tam-poco su yegada ta pone cu mester busca of tuma per-

sonal adicional. AruTram, ya caba tin e personal asigna pa maneha e streetcars aki. AruTram ta e departamento encarga cu tram y ta maneha pa e compania estatal Arubus.

E cantidad di tram cu a wordo destina ta basa riba e estadisticonan concreto cu ta indica e number di bishitante cu ta circula den centro di ciudad. Tambe a tene cuenta cu plan di desaroyo di turismo crucero. Durante dos

ultimo aña, e dos streetcar den operacion actualmente a transporta un total cu ta surpasa e 350 mil persona.

Pa optimalisa e servicio cu AruTram ta brinda na bishitante y local, ta busca pa reduci e tempo cu personanan ta warda na e diferente stop cu tin riba e ruta. E trayecto di e streetcars ta coordina pa medio di sistema computarisa teniendo na cuenta e ubicacion di cada unidad constantemente. □